

Alrededor di 300 contratista trahando den rehabilitacion di refinaria

ORANJESTAD - Director di Citgo, Raymond Buckley a informa cu den e fase inicial pa rehabilita y restart di e refinaria tin alrededor di 300 contratista trahando hunto cu e empleadonan di Citgo mes. El a bisa cu mayoria di e contratistanan ta hendenan local.

Sr. Buckley a duna e declaracion aki durante un entrevista cu e director di Hits 100 Fm, Aldrich Croes su seccion "Entrevista di Dia", caminda el a informa cu den e siguiente dos luna Citgo lo bay tuma den servicio por lo menos 60 operador mas. Tambe nan tin un plan cu probablemente den e prome kwartaal di 2018 lo aumenta e cantidad di operadornan.

Na final ora cu e refinaria ta den full operacion, e ta calcula cu lo tin 500 empleado y un gran mayoria lo ta operadornan nobo. Pues den e transcurso di e prome kwartaal di 2018 e ta premira cu e refinaria lo absorba un total di 200 operador adicional.

Sr. Buckley a papia riba diferente punto entre nan bahamento di contaminacion di medio ambiente pa medio di uzo di gas. Pero tambe riba aspecto di seguridad. E ta considera cu actualmente nan ta den un periodo bastante importante, ya cu nan ta haciendo inspeccion mas den detaye.

Siguridad y restart

Den e proceso pa pone den operacion e refinaria destina pa mehora e crudo pisa cu lo bini for di area di Orinoco na Venezuela, ya tin fase cu a culmina y otronan cu ta canando. E parti di seguridad ta e prome fase cu nan a start cu ne. Ya caba nan a haci esey



y plus nan a cuminsa prepara tur e documento necesario pa e siguiente fase di inspeccion cu nan ta den dje caba.

Ta asina cu unabes cu nan tin e unidadnan cla – ya varios di nan ta cla, entre nan delay coker unit 1- nan ta bay den e fase di inspeccion detaya. Den e fase aki ta uno di ingenieria, el a bisa. Na final e meta ta denter di 6 pa 8 luna nan tin un 'class group' basa den nan escala di operacion.

Nan ta bay restart e refinaria den dos trayecto pa yega na un total di 209 mil bari di procesamiento di crudo (dilluted crude oil). A base di e 'cost estimate' nan ta bay pa full swing den e rehabilitacion di e facilidad. E meta ta pa fin di

2018 bin cu e comienso di e start up di e refinaria.

Hunto cu e trabou d inspeccion nan ta haciendo uzo di e oportunidad di drecha cierto parti di e refinaria. El a laga sa cu e parti di rehabilitacion di e refinaria ta wordo considera como un tour all around grandi di henter e compleho. Mayoria di e gastonan lo bay den e proceso di rehabilitacion di tur e plantanan di e proceso.

Utilidad y medio ambiente

Sr. Buckley a referi na e MoU cu Citgo a firma cu WEB, RdA y Utilities pa conhuntamente haci evaluacion pa recupera e planta cu e refinaria tin di utilidad. Riba e parti di

utilidad e refinaria tin e capacidad di produci awa, genera bapor (steam), coriente.

El a bisa cu e parti di utilidad tanto e boileran como e generator, etc. tur lo haya nan inspeccionnan y manencion debido. Den esaki nan lo traha den paralelo cu Refineria di Aruba (RdA) pa duna informacion necesario tanto na WEB como na Aruba Utilities pa probecha e oportunidad cu WEB lo por tin planta pa suministra coriente y awa na e refinaria. Pero esaki ta depende prome di e evaluacion cu lo wordo haci pa wak si bo tin "business keys" y beneficoso pa ambos parti, ya cu tin inversion cu mester wordo haci.

Parti di nan pensamiento lo ta pa e gas cu lo bini for di Venezuela pa pone draai e refinaria, WEB lo por beneficia di e suministro aki tambe. "Parti di e base ta considera suministro na e refinaria y alabes na Web".

Ya caba el a bisa cu nan a finalisa e parti di e concepto di e proyecto aki y tin diferente ruta cu a wordo evalua tanto na Aruba como na Venezuela. Ya tin cierto adelanto concreto caba di un ruta estab-

leci na Venezuela y Aruba. Tin un punto na Aruba cu lo facilita pa e proceso aki por tuma luga, ya cu –segun director di Citgo—ya caba nos tin tur e infraestructura basico diseña pa ora nan ta link e gas di Venezuela pa e refinaria, e por yega na tur e unidadnan di proceso.

Director di Citgo ta haya cu e uzo di gas ta importante pa genera coriente ya cu e ta baha costo. Ademas e ta mehora e operacion di e parti di rehabilita y e ta positivo pa medio ambiente. Door di switch e refinaria na gas natural, e contenido di azufro cu e refinaria ta emiti ta baha casi 90%. Tambe el a laga sa cu e refinaria tin un planta nobo di recuperacion di azufro pa converti nan den producto.

Sr. Buckley a bisa cu nan meta ta pa tin gas disponibel pa e refinaria. Pero e otro parti tin di haber cu haci uzo di menos gas posibel ya cu si e refinaria uza menos gas, e ta emiti menos contaminacion. Durante nan evaluacion previo, nan a haci estudionan pa reduci e cantidad di energia den nan operacion. "Esaki lo bira nos base pa bay dilanti", director di Citgo kende ta un yiu di tera a bisa.

